



BVrckardus patrem habuit Conradum comitem de Vochburg, ex illustri ducum Bauarię familia oriundum. Cum autem is liberis careret, uxor eius uotum fecerat, sese primum filiũ sacris initiaturum, ut Deo docendo & orando inferiret. Itaq; filius à teneris annis literis instructus, ob foelicem indolem præclaram eruditionem nactus est. In primis autẽ pauperes amauit, atq; captiuos passim suo pretio liberauit, ita ut breui ubiq; innotesceret. Cum autem amici instarent, ut Cęsaris uiam aliquandiu sequeretur, tandem cõsensit, & ad Conradum Cęsarem peruenit. Is breui eius uirtutes intellexit, & mirum in modum amauit. Acci-

dit quandoq; ut legatus à Cęsare Ratisbonam mitteretur. Ibi in templo orãs hydropicum pauperem elemosynam petentem conspexit. Itaq; cum neminem circa se uideret, accessit, & ægrotum corpus osculatus est. unde is sanitati restitutus fuit. Deinde in Saxoniam ablegatus. Ibi duo nobiles uiri à maleuolis accusati, capitis damnati fuerunt. Cum autem educerentur ut gladio ferirentur, Burckardus causa secum deliberata iudices accessit, ac petijt, ut iudicium tantisper differeretur, dum ipse quædam de ea re aperiret. Id quod etiã consecutus est.